



PARLAMENT DE CATALUNYA

Cicle «Violència masclista enes hilats sociaus»

Session 1: «Es hilats sociaus: un espaci public de participacion»

Relatora: Jenn Díaz, membre deth Grop de Treball en Equitat de Genre deth Parlament de Catalonha pendent era catorzau legislatura

Conclusions

Es violéncies masclistes an adaptat es sues formes tanben ar entorn digitau, coma ja reconeishie era Lei 17/2020, de 22 de deseme, de modificacion dera Lei 5/2008, deth dret des hemnes a erradicar era violència masclista, aprovada ena dotzau legislatura. Era violència digitau s'a convertit en un fenomèn omnipresent en ua societat iperconnectada. Entà abordar aguesta problematica complexa e qu'opèrè de manèra desparièra des d'un punt d'enguarda interseccionau, ei essenciau establir marcs legislatius fòrts e assegurar eth compliment efectiu des normatives existentes. Aguest brèu informe, frut deth cicle contra era violència masclista enes hilats sociaus organizat peth Parlament de Catalonha, preten analisar es principaus punts restacadi damb era luta contra era violència masclista en linha des d'ua perspectiva interseccionau, e ne destaque es rèptes, es oportunitats e es besonhs d'accion futura.

Marc legislatiu e compliment normatiu

Enes intervencions des ponents, expèrtes en violéncies digitaus, s'a identificat era importància de disposar de marcs legislatius robusts entà abordar era violència en linha. Era directiva dera Union Europèa entà lutar contra era violència masclista digitau ei un pas significatiu en aguest sens. Maugrat açò, cau garantir eth compliment d'aguestes normatives mejançant mecanismes d'auditoria independents e ua supervision efectiva.

Complexitat dera violència digitau

Era violència digitau arrenh diuèrses formes, des deth secutament en linha enquiara divulgacion non consentida de materiau intim. Açò requerís un enfocament integrau que considèrè es multiples dimensions deth fenomèn.

Perspectiva interseccionau

Ei cruciau reconèisher qu'era violència digitau afècte de manèra diferenta a divèrsi grops dera societat, segons factors coma eth genre, era raça e era classa sociau. Aguesta perspectiva interseccionau ei fundamentau entà comprèner e abordar eficaçament era violència digitau des d'ua optica inclusiva.

Batalha culturau e educativa

Combàter era violència digitau requerís liurar ua batalha culturau e educativa entà fomentar valors de respècte, igualtat e non-violència en toti es encastres dera societat.

Açò includís campanyes de sensibilizacion, programes educatius e accions entà cambiar es actituds sociaus.

Collaboracion e dialòg

Era luta contra era violéncia digitau exigís ua collaboracion estreta entre diuèrsi actors, en tot includir-i govèrns, plataformes digitaus, societat civila e comunitats acadèmiques. Cau crear espacis de dialòg e coordinacion entà desvolopar estratègies efectives.

Regulacion e proteccion des drets

Trobar un equilibri entre era regulacion dera violéncia digitau e era proteccion des drets fundamentaus ei essenciau. Es politiquas an d'èster proporcionades e cau assegurar que non restringisquen indegudament es drets individuaus en tant que protegissen contra era violéncia digitau.

Rèptes futurs

Maugrat es auanci arrenhudi ena luta contra era violéncia masclista en linha, encara i a rèptes importants que cau abordar. Ei cruciau contunhar de trabalhar entà regular de manèra efectiva es plataformes digitaus, garantir era proteccion des drets individuaus e adoptar ua perspectiva interseccionau entà assegurar ua luta inclusiva e equitativa contra era violéncia digitau en totes es sues formes.

Conclusion finau

Eth Grop de Trabalh en Equitat de Genre, integrat per membres dera Oficina d'Igualtat, grops parlamentaris, trabalhadores e auti actors, exercís un papèr de supervision des iniciatives restacades damb eth Plan d'Igualtat. Era nòsta prioritat ei contribuir ath desvolopament de coneishement e expertesa en aquest encastre. Arregraïm especiaument era participacion des ponents d'aquesta session. Era sua contribucion a estat cruciau entà enriquir era nòsta comprenença ath torn deth comportament dera violéncia digitau e der impacte qu'a enes nòstes vides. Eth nòste prètzhèt implique non sonque legislar entà dar responsa as besonhs dera societat actuau, mès tanben crear espacis de dialòg en Parlament, entà contribuïr qualitativament ath debat e entà generar sinergies e espacis d'amassada entre eth Parlament de Catalonha e era societat civila organizada.

Comprenem qu'èm immergits en ua batalha culturau en qué es hilats sociaus exercissen ua influéncia significativa. Ei cruciau tèisher estratègies pr'amor qu'aguestes plataformes non venguen espacis ostils, mès entorns segurs entà toti. Era cibervioléncia masclista, coma se soslinhèc, manten ua estreta relacion damb d'aves formes de discors d'òdi, coma eth racisme e eth fascisme, hèt que requerís ua atencion diferenciada e un abordatge integrat.

Entà concludir, volem destacar era importància d'aquest cicle d'activitats, que cerque generar coneishement e propòstes entà abordar era violéncia digitau, tant ena esfèra publica coma ena privada. Aquest espaci de dialòg ei fundamentau entà enfortir-mos e deféner es nòsti drets deuant qu'insevolha forma de violéncia. Maugrat es rèptes, contunharam d'auançar en aquesta direccion entà garantir un entorn digitau segur e respectuós entà toti.